



Protocol

dalla seduta dil cussegl da vischnaunca,
venderdis, ils 13 da december 2013, allas 19³⁰– 21¹⁰ uras
ella staziun da muntogna a Caischavedra tier las pendicularas Mustér SA

Presidi: Flavio Murer

Actuar: Ervin Maissen

Presents:

- | | | |
|------------------------------------|---|--|
| a) Cussegl | Christoph Berger Armin Berther Adrian Bigliel Silvio Candinas Edgar Durschei Rita Huonder-Tenner Wendelin Jacomet | Jordana Lozza-Desax Armin Manetsch Flavio Murer Adrian Pally Marco Schmed Alfred Spescha Livio Zanetti |
| b) Suprastonza communala | Francestg Cajacob Madlen Deflorin-Spescha Cecilia Maissen | Iso Mazzetta Roger Tuor |
| c) Cumissiun da gestiun 2014/16 | Manfred Caviezel Beat Hosang | Toni Huonder |
| d) Canzlist communal | Andri Hendry | |
| e) Perstgisas | Rico Tuor | |
| f) Hosps | 2 personas | |

Ruedi Büchi, director dalla Pendicularas Mustér SA

Orientescha il cussegl da vischnaunca davart il menaschi dalla Pendicularas Mustér SA. Schegie che las pendicularas hagian en sia historia da biebein 40 onns saviu possibilitar nuninterruttamein il menaschi d'unviern, para ei il mument tuttina curios ch'ins prepara las premissas per saver realisar stabiliments per producir neiv artificiala.

Per las pendicularas denton e tut ils menaschis affiliai eis ei impurtont da saver entscheiver la sesiun d'unviern in termin fix. Perquei basegna ei stabiliments d'ennevar. Hotels e habitaziuns ein sco las pendicularas visai vi ch'ins sappi arver la sesiun d'unviern in termin fix. Senza neiv artificiala ei l'entschatta dalla sesiun d'unviern el decuors dil december buca adina garantida.

El rom dalla revisiun parziala dalla planisaziun locala duei igl entir perimeter che vegn ennevaus vegnir fixaus. La realisaziun succeda denton el rom dallas pusseivladads finanzialas e tenor basegns. Ils stabiliments duein vegnir realisai en cumbinaziun cun autras ovras. Numnadamein il provediment d'aua a Lag da Tgauns che furnescha l'entschatta digl unviern avunda aua per producir neiv ni ina cumbinaziun cun l'ovra electrica Val Acletta, ch'ei actualme in planisaziun. Pusseivel ei era il diever dall'aua dil scul dil reservuar a Sontga Catrina.

Suenter la seduta dil cussegl – duront tscheina – suondan ulteriuras informaziuns. Plinavon vegnan ils presents empalai atras la part tecnica dil baghetg principal dalla staziun da muntogna a Caischavedra.

“Jeu beneventel Vus alla otgavla seduta dalla perioda d'uffeci 2013/2016 cheu a Caischavedra.

Jeu engraziel grondamein che las instanzas politicas dalla vischnaunca da Mustér vegnan informadas questa sera directamein el liug e quei entras las persunas dil fatg.

In onn va prest puspei alla fin e mintgin da nus duess en in ruasseivel mument, ils quals ein deplorablamein scarts, reflectar e sedumandar sch'ins sez ei s'engaschaus cumpleinamein pil beinstar da nossa vischnaunca e nossa cuminonza.

Jeu persunalme in sundel buca igl amitg dils buns propiests. Tuttina val'ei pigl onn vegnent da restar fideivels alla strategia elaborada ed acceptada, seigi quei cul preventiv, cun il plan d'activitads ni il plan da finanzas.

Nossa suprem'incarica ei da perdegar e viver quella strategia di per di e da mirar ch'ella contonschi mintga vischina e vischin.

Ha enzatgi da nus in di tuttina la fleivlezia da sviar dallas cunvegrientschas strategicas, eis ei noss'obligaziun da visar vi sin quei fatg a moda gentila.

Fetg grond plascher hai jeu da comunicar dapi nossa davosa seduta dil cussegl da vischnaunca ina naschientscha:

Curdin Maissen senumna nies niev vischin. Ad el in cordial beinvegni ed als loschs geniturs nossa cordiala gratulaziun.

Cunquei arvel l'otgavla seduta dalla perioda d'uffeci 2013/2016.”

Tractandas:

1. Protocols nr. 7.1 e 7.2-2013/2016
2. Saramentaziun commembers cumissiun da gestiun 2014/2016
3. Lescha d'explotaziun (messadi nr. 8-2013/2016)
4. Postulat davart in studi da factibilitad pertuccont ina colligiaziun dils uclauns Segnas-Acletta-Clavianev cun ina via per promover l'attractivitat e la mobilitad dils uclauns sco era ina punt pendent per spassegiar denter Ragischs e Pignola: Rapport (postulat P5-2009/2012)
5. Postulat per ina elaboraziun d'in pareri entras in biro specialisau, partenent „zonas da tempo 30": Rapport (postulat P5-2009/2012)
6. Agenda 2014
7. Ura da damondas (conform ad art. 44 dil regulativ da fatschentas)
8. Elecziuns:
 - 8.1. dil president ni dalla presidenta dil cussegl da vischnaunca per 2014
 - 8.2. dil vicepresident ni dalla vicepresidente dil cussegl da vischnaunca per 2014

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



Cussegl da vischnaunca 08-2013/2016
Seduta dils 13 da december 2013

1. Protocols nr. 7.1 e 7.2-2013/2016

President dil cussegl da vischnaunca

Ils protocols ein vegni tarmess tier per posiziun. Enteifer ils 5 dis fixai ei vegniu inoltrau neginas objecziuns.

Ils protocols nr. 7.1-2013/2016 dalla seduta dils 8 da november e nr. 7.2-2013/2016 dils 12 da november 2013 vegnan approvai senza midadas.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



Cussegl da vischnaunca 08-2013/2016
Seduta dils 13 da december 2013

2. Saramentaziun commembers cumissiun da gestiun 2014/2016

President dil cussegl da vischnaunca

Dumengia, ils 24 da november 2013 ha il pievel da Mustér eligiu Toni Huonder, Beat Hosang e Manfred Caviezel commembers dalla cumissiun da gestiun per la perioda d'uffeci 2014/2016.

Ils novs commembers dalla cumissiun da gestiun engiran d'ademplier tut las obligaziuns da lur uffeci tenor meglier saver e puder.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



3. Lescha d'exploitaziun (messadi nr. 8-2013/2016)

Suprastonza communal

En num dalla suprastonza communal ed a basa dil messadi nr. 8-2013/2015 presenta president communal Francestg Cajacob la fatschenta.

La lescha vertenta pretenda el cass d'ina lubientscha d'exploraziun era gest la lubientscha per l'exploitaziun. Quei ei era stau in motiv pertgei che la damonda d'exploraziun ei vegnida renviada entras il suveran medelin.

Per possibilitar ina lubientscha d'exploraziun senza stuer conceder ina lubientscha d'exploitaziun han ils presidents comunals dalla Cadi en collaboraziun cun in cusseglader giuridic surluvrau la lescha. La lescha ei in'ovra harmonisada e duei haver valur en tuttas vischnauncas. Principalmein ei la vart dretga dil Rein Anteriu interessanta per las retschercas suenter aur. Suenter la vischnaunca da Mustér vegnan las vischnauncas da Sumvitg, Medel e Trun a suttametter quella lescha all'istanza cumpetenta. La vischnaunca da Tujetsch preveda da surpender pli tard la medema lescha.

Discussiun davart la debatta d'entrada

Cussegl da vischnaunca

Secumportan las activitads en connex cun las retschercas pigl aur cul project Parc Adula? Co stat ei culs conflicts denter project e natira? Dat l'intrepresa che survegn ina lubientscha d'exploraziun era la caparra e necessaria segirtad finanziaria per refar las consequenzas d'ina exploraziun? Ils vischins da Medel han giu refiers la damonda d'exploitaziun. Ei in'exploitaziun in tema tier nus el cass ch'ins anflass aur?

Suprastonza communal

Las lavurs d'exploraziun duessen caschunar neginas collisiuns d'interess cun il Parc Adula. Enteifer la zona da coc ein denton tuttas exploitaziuns scumandadas. Ella zona circumdonta duessen exploitaziuns denton esser pusseivlas. L'exploitaziun dad aur basegna denton grondas resursas finanzialas. Ils mieds leutier vegnan recaltgai alla buorsa. El cass d'ina exploitaziun sto l'intrepresa garantir las mesiras da cumpensaziun e da refatg dalla cuntrada entras ina segirtad finanziaria (depot).

Sco la lescha ei formulada oz, han ils medelins stuiu decider davart l'exploitaziun per che la vischnaunca sappi conceder ina lubientscha d'exploraziun. Cun la lescha revedida sa la suprastonza communal conceder ina lubientscha d'exploraziun. Per l'exploitaziun basegna ei dad ina vart las mesiras planisatorias, da l'autra vart vegn il pievel a decider davart la lubientscha per in'exploitaziun. El rom dalla planisaziun locala vegnan era il cantun e las organisaziuns pigl ambient a saver prender posiziun.

Cussegl da vischnaunca

Priu che las ulteriuras vischnauncas san buca s'accordar cun la lescha, co sepresentan lu las consequenzas per ina collaboraziun sur ils cunfins dallas vischnauncas? Fuss ei buca necessari da reglar ella lescha ils spazis resp. il temps da ruaus? El messadi han ins saviu leger pauc dalla historia davart il

svilup dallas retschercas en connex cun l'explotaziun dad aur. Tgi ei stau responsabels per surluvrar la lescha e vegn quella lu transladata el lungatg official dalla vischnaunca? Tenor constituziun communal ei il romontsch il lungatg official dalla vischnaunca.

Suprastonza communal

La damonda davart ina translaziun romontscha vegn ponderada. Ei setracta cheu denton d'in document che regla las cundiziuns d'ina collaboraziun denter interpresas internaziunalas. Perquei basegna ei en mintga cass sper la versiun tudestga dalla lescha era ina versiun englesa. La lescha ei relativamein cumplexa. Perquei ein ins ensemen cul giurist secunvegni pil lungatg tudestg. La consultaziun per la lescha ei medemamein succedida per tudestg.

La damonda davart il temps da ruaus sa vegnir reglada entras ina resalva ella lubientscha. Ei vegn ad esser aschia ch'ins sto reglar in tschuat detagls cun resalvas, mintgamai tenor il cuntegn dalla lubientscha ni concessiun.

La surfatscha dil perimeter d'exploraziun sa s'extender sur il territori da pliras vischnauncas. Perquei eis ei evident che las leschas vegnan harmonisadas, aschia ch'ei vala per tuts las medemas cundiziuns.

Cussegl da vischnaunca

Han ins consultau il medem giurist sco quel ch'ei staus gia avon 5 onns vid l'elaboraziun dalla lescha? Independentamein dalla formulaziun dalla lescha che possibilitava buca exploraziuns senza ina lubientscha d'explotaziun, ei vegniu fatg differentas retschercas suenter aur. Pertgei eis ei ussa necessari da midar la lescha per possibilitar las exploraziuns?

Tenor la lescha ei la vischnaunca responsabla per conceder lubientschas d'exploraziun. Pertgei han ins buca definiu cheu la suprastonza communal sco autoritad responsabla?

Co eis ei previu da quintar giu ils recavs, sche las lavurs succedan il medem mument enteifer il perimeter da pliras vischnauncas?

Suprastonza communal

Dapi che la vischnaunca da Medel ha detg na alla lubientscha d'explotaziun ein succedidas neginas exploraziuns. Ins ha rimnau crappa dalla surfatscha e duvrau quella per analizar pusseivels fastitgs d'aur el terren. Pli baul han giu liug exploraziuns, denton senza ch'ina lescha corrispudenta era avon maun. Quella gada ei buca la medema persuna giuridica stada involucada sco avon 5 onns.

Per conceder la lubientscha han ins definiu la vischnaunca. Tgei autoritad ch'ei competenta da conceder ina lubientscha ei lu reglau ella constituziun communal dalla vischnaunca respectiva.

Ils detagls pertuccont l'indemnisaziun ein aunc buca fixai. Denton vegn quei a succeder en proporziun dalla surfatscha ni dalla lunghezia dalla galleria.

Cussegl da vischnaunca

Enconuschan ins schon tgei firma che duess far las explotaziuns? El decuors dils onns han ils proprietaris gie midau differentas gadas num. Enconuschentamein setracta ei d'ina firma dil Canada. Cun tgi ha la vischnaunca da contrahar cheu, essan nus segirai giu che l'interpresa sa buca seslutar da sia responsablada? Con lunsch eis ei segirau che l'interpresa sto star buna da metter en uorden ils contuorns e plazzals?

Suprastonza communalala

Pertuccont segirtads san ins parter da quei, ch'ina exploraziun ei cumbinada cun pintgas rescas ed aschia cun pintgas influenzas negativas pigl ambient. Ei dat intrepresas ch'ei specialisadas sin l'exploraziun, ferton ch'altres interpresas cumpran ils resultats dall'exploraziun e procuran lu l'explotaziun.

L'explotaziun dad aur ein ina branscha speculativa cun potenzial da sperdita. Perquei eis ei el cass d'ina explotaziun necessari da procurar per las segirtads necessarias. Liug da dertgira ei en Svizra. La cumposiziun mineralogica lubescha buca da far diever da mieds chemics per explotar igl aur. Ins vegn a stuer mular il crap aschia, ch'igl aur sa vegnir lavaus ora cun aua.

Tractaziun dalla fatschenta en detagl

Cunquei ch'ei vegn fatg negina cunterproposta, ha il cussegl decidiu d'entrar e tractar la fatschenta en detagl.

II. Lubientscha d'exploraziun

Art. 7 taxas d'exploraziun

Cussegl da vischnaunca

Vala la lubientscha exclusivamein per ina interpresa ed ei la summa definida sco taxa per l'exploraziun restrenschida sin in cert spazi ni vala la taxa per l'entira vischnaunca?

Suprastonza communalala

Il dretg per l'exploraziun ei limitaun exclusivamein per ina firma e quei pigl entir intschess dalla vischnaunca. Il dretg vegn limitaun per regla sin 5 onns.

III. Concessiun d'explotaziun

Art. 8, al. 1 dretg sin la concessiun

Art. 9, al. 1 cuntegn

Cussegl da vischnaunca

Pertgei han ins striaun la noziun "mineralischen Rohstoffe" els dus artechels?

Suprastonza communalala

Quella noziun ei vegnida francada egl art. 1 dalla lescha, aschia ch'ins ha saviu desister da quella egl art. 8, al. 1.

IV. Consegn da produenziun

Art. 27, lit. c calculaziun dalla taxa da produenziun

Cussegl da vischnaunca

La descripziun pertuccont deducziuns en connex cun grevezias che sedattan ord indemnisaziuns enviars tiarzas personas sto vegnir precisada pli exactamein. Quella formulaziun savess tenor situaziun haver per consequenza ch'ei restass il davos nuot per la vischnaunca.

Suprastonza communalala

Quella damonda ei buca vegnida dilucidada en detagl. Ins ei sebasaus cheu sin la lescha existenta. Quella damonda vegn sclarida per saver informar il cussegl.

President dil cussegl da vischnaunca

Dat la pusseivladad da revegnir ad in artechel u l'auter.

Art. 11, lit. e premissa per ina concessiun

Cussegl da vischnaunca

Pertgei han ins strihau l'obligaziun che l'interpresa stoppi disponer davart in'assicuranza da responsablada?

Suprastonza communalala

Quella formulaziun ei buca exnum necessaria en la lescha, denton basegna in'interpresa en mintga cass ina assicuranza da responsablada.

Cussegl da vischnaunca

Eis ei buca era necessari ch'ins fixeschi ella lescha il liug da dertgira?

Ins duess fixar l'obligaziun per ina segirada da responsablada ella lescha per ch'ins hagi era ina pusseivladad d'obligar l'interpresa ad in'assicuranza. Existan aunc prescripziuns surordinadas che reglan damondas ch'ei eventualmein buca regladas ella lescha communalala?

Suprastonza communalala

Il liug da dertgira vegn buca reglaus en ina lescha. En quei cass sto quei liug denton esser en Svizra.

En Svizra existan neginas prescripziuns surordinadas pertuccont l'industria da minieras, ferton che l'Austria enconuscha per quella branscha in agen ministeri.

Ord vesta giuridica eis ei buca necessari da francar en quei liug l'obligaziun per in'assicuranza da responsablada. Plinavon sa la vischnaunca sin fundament digl art. 5, al. 2 pretender in'assicuranza da responsablada.

Cusseglia Livio Zanetti

Propona da midar la formulaziun dalla davosa construcziun digl art. 5, al. 2 en quei senn, ch'igl ei obligau da pretender l'assicuranza da responsablada, numnadamein:

“Ausserdem **muss** sie auch den Abschluss einer ausreichenden Haftpflichtversicherung verlangen.”

Votaziun

Cun 10 encunter 3 vuschs ed 1 abstenziun approbescha il cussegl da vischnaunca la proposta da cusseglier Livio Zanetti.

Decisiun

Cun 14 encunter 0 vuschs decida il cussegl da vischnaunca:

- 1. d'approbar la revisiun parziala dalla lescha d'explotaziun – pendent resta l'informaziun tier art. 27, lit. c da questa lescha;*
- 2. da suttametter quei conclus el senn d'art. 21, lit. b dalla constituziun communal al referendum facultativ.*

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



Cussegl da vischnaunca 08-2013/2016
Seduta dils 13 da december 2013

4. Postulat davart in studi da factibilitad pertuccont ina colligiaziun dils uclauns Segnas-Acletta-Clavaniev cun ina via per promover l'attractivitat e la mobilitad dils uclauns sco era ina punt pendentia per spassegiar denter Ragischs e Pignola: Rapport (postulat P5-2009/2012)

Suprastonza communal

Sco gia rapportau a caschun dallas sedutas dils 17 da zercladur 2011 ed ils 15 da mars 2013 ei in'eventuala colligiaziun denter Segnas-Acletta-Clavaniev d'examinar ensemen cun la meglieraziun funsila.

En rama dalla meglieraziun funsila ei previu ina via era per diever forestal denter Cuoz e Peisel. Quella cuntinuass entochen Pardi resp. entochen Plaun Menisch. Plinavon ei planisau ina via funsila che colligiass Glaretsch cun Acletta. Ina via funsila denter Acletta - Crest Muntatsch, cunzun muort il pign diever agricol, ei buca prevedida. Era schischessen ils aults cuosts en negina relaziun cun il nez. Supplementarmein stuess il standard vegnir augmentaus, quei che caschunass cuosts buca responsabels (p.ex. vias pli ladas e per dapli tonnaschas). Quels cuosts stuess la vischnaunca surprender cumpleinamein.

Per la punt pendentia da Ragischs a Plaun da Diras ni da Ragischs a S.Gada ha la suprastonza communal schau sclarir ils cuosts e la realisaziun en in cuort studi. Quels muntan a rodund 1.2 milliuns francs per l'investiziun e cuosts da manteniment da ca. 30'000.-- francs per onn.

Ils cuosts per in bus local da stad ed unviern che carrass sur ils vischinadis colligiai da niev, custass rodund 180'000.-- francs dapli ad onn che oz.

La suprastonza communal propona al cussegl da vischnaunca:

a) da prender enconuschientscha dil rapport

b) da scriver giu il postulat

Cussegl da vischnaunca

Senza discussiun pren il cussegl da vischnaunca enconuschientscha dil rapport dalla suprastonza communal.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



Cussegl da vischnaunca 08-2013/2016

Seduta dils 13 da december 2013

5. Postulat per ina elaboraziun d'in pareri entras in biro specialisau, partenent „zonas da tempo 30": Rapport (postulat P5-2009/2012)

Suprastonza communal

Sco giu menziunau ha la suprastonza sclariu culs vischinadis il giavisch d'introducir ina zona da tempo 30.

Negins vischinadis giavischan ina zona da tempo 30. Sulettamein sigl intschesch dalla via cantunala a Casa Nauscha resp. Buretsch duei vegnir installau placats per far attents ils utilisaders dalla via sin affons. En quei connex ha la vischnaunca aunc cumprau ulteriurs apparats che mesiran ed indichesch la spertadad. In ei gia montaus a Buretsch, in ulterior vegn montaus primavera proxima.

Ord quels motifs fa la suprastonza communal la proposta da desister d'in pareri che cuosta rodund 12'000.-- francs.

La suprastonza communal propona al cussegl da vischnaunca:

a) da prender enconuschientscha dil rapport

b) da scriver giu il postulat

Cussegl da vischnaunca

Senza discussiun pren il cussegl da vischnaunca enconuschientscha dil rapport dalla suprastonza communal.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



Cussegl da vischnaunca 08-2013/2016
Seduta dils 13 da december 2013

6. Agenda 2014

Cussegl da vischnaunca

Il cussegl da vischnaunca pren enconuschientscha dils suandonts termins da seduta pigl onn 2014:

1. **24 da schaner 2014 a Sedrun**

Lescha da turissem cun il cussegl da vischnaunca da Tujetsch

2. **21 da fevrer 2014**

3. **28 da mars 2014**

4. **23 d'avrel 2014**

Quen 2013

5. **13 da zercladur 2014**

6. **22 d'uost 2014**

7. **20 da november 2014**

Preventiv 2015

7. **21 da november 2014**

Program d'actividad e plan da finanzas

8. **12 da december 2014**

Seduta finala

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



7. Ura da damondas (conform ad art. 44 dil regulativ da fatschentas)

Cussegl da vischnaunca

Naven digl 1. da november 2013 ein ils biros da Sedrun Mustér Turissem endrizzai a Sontga Catrina tier las pendicularas resp. alla staziun dalla Viafier retica. A Sontga Catrina para tut da funcziunar, medemamein han ins signalisau generusamein il biro naven dalla Via Alpsu. Alla staziun sentan ins denton aunc nuot dallas midadas ed apparentamein ei era il personal dalla viafier buca informaus davart las novas incaricas. A vesta dalla munconza da neiv ed era dil fatg che buca tuts hosps da vacanzas van cun skis, eis ei necessari ch'ils hosps sappien era s'informar el Vitg (staziun) davart la porschida turistica e buca mo tier las pendicularas a Sontga Catrina. Eis ei previu da metter en funcziun il biro alla staziun aunc avon Nadal?

Suprastonza communal

Vegn a sclarir schebein ils conclus da SMT ein era vegni realisai alla staziun.

Rita Tenner-Huonder, presidenta dalla cumissiun da gestiun

Engrazia alla suprastonza communal sco era als collaboraturs dalla vischnaunca per la buna collaboraziun e per la lavur che vegn prestada. Alla nova cumissiun da gestiun, che passa igl 1. da schaner 2014 en uffeci, giavischa ella bien maun.

Ella constatescha che la pagina d'internet dalla vischnaunca cuntegn aunc buca la versiun actuala dil regulativ da fatschentas. Plinavon seigi il regulativ dalla direcziun era aunc buca publicaus egl internet e la cumissiun da gestiun hagi aunc buca retschert la survesta dils credits che cuoran.

Suprastonza communal

Admetta medemamein in engraziament alla cumissiun da gestiun per la buna collaboraziun. L'actualisaziun dil regulativ da fatschentas sin la pagina d'internet vegn messa en uorden. Pertuccont il regulativ per la direcziun ei la versiun romontscha aunc buca elaborada, perquei ei quel era aunc buca publicaus.

Suprastonza communal

Il project pertuccont l'etica da signalisaziun ei en lavur. Il prestudi ei vegnius surdaus da cuort alla vischnaunca. El decuors dil schaner duess la vischnaunca obtener ulteriurs detagls. Sin fundament da quels vegnan ins ad instradar las proceduras d'approbaziun e las contractivas cun ils pertuccai.

En connex cun l'Ovra Russein cuoran actualmein las contractivas pertuccont la realisaziun dallas mesiras da cumpensaziun a Fontanivas. Il project ei vegnius approbaus en connex cul project da concessiun, aschia che las lubientschas ein avon maun.

La realisaziun succeda sut l'egida dall'AXPO ch'ei patrun da construcziun. La vischnaunca vegn a stuer separticipar als cuosts restonts che semovan entochen a maximalmein frs 250'000.--.

Tenor situaziun eis ei pusseivel che quels restan en la cumpetenzza dalla suprastanza communal. Aschinavon che la vischnaunca vegn a stuer separticipar cun ina summa da sur frs. 100'000.--, vegn la damonda da credit suttamessa el decuors dalla primavera proxima al cussegl da vischnaunca.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen



Cussegl da vischnaunca 08-2013/2016

Seduta dils 13 da december 2013

8. Elecziuns

President dil cussegl da vischnaunca

L'elecziun dil president e dil vicepresidente dil cussegl da vischnaunca succedan a scret.

8.1. dil president ni dalla presidenta dil cussegl da vischnaunca per 2014

Cusseglia Adrian Pally

Propona Flavio Murer per in ulteriur onn sco president dil cussegl da vischnaunca. La gronda part dils commembers dil cussegl da vischnaunca ein pér in onn en uffeci. Flavio Murer dispona dall'experientscha per menar il cussegl da vischnaunca ed ha era documentau quei cun sia lavur duront igl onn 2013.

Elecziun

Votaziun per scrutini

| | |
|------------------|----|
| Cedels reparti | 14 |
| Cedels returnai | 14 |
| Cedels vits | 2 |
| Cedels valeivels | 12 |

Cun 12 vuschs ei cusseglier Flavio Murer eligius sco president dil cussegl da vischnaunca pigl onn 2014.

8.2. dil vicepresidente ni dalla vicepresidente dil cussegl da vischnaunca per 2014

President dil cussegl da vischnaunca

Il biro dil cussegl propoza Wendelin Jacomet per in ulteriur onn sco vicepresidente pil cussegl da vischnaunca. Wendelin Jacomet ha prestau buna lavur e documentau ch'el ademplescha las premissas per ademplir quei uffeci.

Elecziun

Votaziun per scrutini

| | |
|------------------|----|
| Cedels reparti | 14 |
| Cedels returnai | 14 |
| Cedels vits | 1 |
| Cedels valeivels | 13 |

Cusseglia Wendelin Jacomet obtegn 8 vuschs

Cusseglia Christoph Berger obtegn 5 vuschs

Cun 8 vuschs ei cusseglier Wendelin Jacomet eligius sco vicepresidente dil cussegl da vischnaunca pigl onn 2014.

Cusseglia Wendelin Jacomet

A vesta dil resultat dall'elecziun desista el da sia elecziun sco vicepresidente dil cussegl da vischnaunca.

En quei cass succeda in niev scrutini per l'elecziun dil vicepresidente dil cussegl da vischnaunca.

Cusseglia Marco Schmed

Propona cusseglier Edgar Durschei sco niev vicepresident dil cussegl da vischnaunca.

Elecziun

Votaziun per scrutini

| | |
|------------------|----|
| Cedels reparti | 14 |
| Cedels returnai | 14 |
| Cedels vits | 2 |
| Cedels valeivels | 12 |

Cusseglia Edgar Durschei obtegn 11 vuschs

Cusseglia Christoph Berger obtegn 1 vusch

Cun 11 vuschs ei cusseglier Edgar Durschei eligius sco vicepresident dil cussegl da vischnaunca pigl onn 2014.

Cusseglia Edgar Durschei

Accepta l'elecziun sco vicepresident dil cussegl da vischnaunca pigl onn 2014.

President dil cussegl da vischnaunca

La proxima seduta dil cussegl da vischnaunca ha liug ils 24 da schaner 2014 a Sedrun. Ulteriuramein envida el da prender part a differentas occurrenzas che han liug las proximas jamnas en vischnaunca.

Cussegl da vischnaunca Disentis/Mustér
Il president: Igl actuar:

Flavio Murer

Ervin Maissen

Disentis/Mustér, ils 20 da december 2013

G:\Uffeci baghegiar\Cussegl da vischnaunca\Cussegl da vischnaunca 2013_16\Protocols\Cus0016_08.docx